

OUDTSHOORN MUNISIPALITEIT
VERORDENING INSAKE OPENBARE GERIEWE

Doel van Verordening

- Om die verwesenliking van 'n veilige en rustige omgewing te bevorder;
- Om voorsiening te maak vir prosedures, metodes en praktyke om die gebruik en bestuur van openbare geriewe te reguleer.

Woordbepaling

1. In hierdie verordening sluit woorde wat die manlike geslag aandui, ook die vroulike geslag in, sluit die enkelvoud die meervoud in en omgekeerd, geniet die Afrikaanse teks voorrang in die geval van 'n teenstrydigheid tussen die verskillende tekste, en tensy dit uit die samehang anders blyk, beteken: -

"kennisgewing" 'n amptelike kennisgewing deur die munisipaliteit opgestel en wat vertoon word by elke ingang tot of op 'n opsigtelike plek in, by of op 'n openbare gerief waardeur die munisipaliteit bepalings of voorskrifte wat hy ingevolge hierdie verordening aangeneem het, bekend maak;

"munisipaliteit" die munisipaliteit van Oudtshoorn gestig in terme van Artikel 12 van die Munisipale Strukturewet, 117 van 1998, Provinsiale Kennisgewing 502 gedateer 22 September 2000 en sluit in enige politieke struktuur, politieke ampsbekleeder, raadslid, behoorlik gevlmagtigde agent daarvan of enige werknemer daarvan handelende ingevolge hierdie verordening uit hoofde van 'n bevoegdheid van die munisipaliteit wat gedelegeer of subgedelegeer is aan gemelde politieke struktuur, politieke ampsbekleeder, raadslid, agent of werknemer;

"openbare gerief" –

- (a) enige grond, plein, kampeerterrin, swembadterrein, rivier, openbare oord, ontspanningsgrond, natuurreservaat, diere-, botaniese- of ander tuin, park, speelpark, sportterrein of wandelpad, met inbegrip van enige gedeelte daarvan en enige fasiliteit of apparaat daarin of daarop;
- (b) enige gebou, struktuur, saal, kamer of kantoor met inbegrip van enige gedeelte daarvan en enige fasiliteit of apparaat daarin, wat die eiendom is van, of besit, beheer of gehuur word deur die munisipaliteit en waartoe die algemene publiek toegang het, hetsy teen betaling van toegangselde al dan nie;

maar uitgesonderd:

- (i) enige publieke pad of straat;

- (ii) enige openbare gerief in paragrawe (a) en (b) bedoel, indien dit wettiglik ingevolge 'n ooreenkoms deur 'n ander persoon as die munisipaliteit beheer en bestuur word, en
- (iii) enige openbare gerief wat van die munisipaliteit gehuur word.

Maksimum getal besoekers

- 2. (1) Die munisipaliteit kan die maksimum getal besoekers wat op 'n bepaalde tydstip in of by 'n openbare gerief aanwesig mag wees, bepaal; met dien verstande dat verskillende getalle aldus vir verskillende openbare geriewe bepaal kan word.
- (2) Die getalle in subartikel (1) bedoel, word deur die munisipaliteit bekend gemaak by wyse van 'n kennisgewing.

Toegang tot en verblyf in 'n openbare gerief

- 3. (1) 'n Openbare gerief is, behoudens die bepalings van hierdie verordeninge, oop vir die publiek op die tye wat die munisipaliteit bepaal;
- (2) Geen besoeker mag 'n openbare gerief binnegaan of verlaat op 'n ander plek as die wat vir daardie doel aangedui is nie.
- (3) Die tye en plekke in subartikel (1) en (2) bedoel, word deur die munisipaliteit by wyse van 'n kennisgewing bekend gemaak.

Toegangsgelde

- 4. (1) 'n Besoeker aan 'n openbare gerief betaal die toegangsgelde wat van tyd tot tyd deur die munisipaliteit vasgestel word en sodanige toegangsgelde word by wyse van kennisgewing bekend gemaak.
- (2) Verskillende toegangsgelde kan aldus ten opsigte van besoekers van verskillende ouderdomme vasgestel word en die munisipaliteit kan sekere groepe persone vrystel van die betaling van enige toegangsgelde.

Oorlaste

- 5. Geen persoon mag in of by 'n openbare gerief enigeen van die volgende handeling verrig of toelaat dat dit verrig word nie –
 - (a) die gebruik van taal of die verrigting van enige ander handeling wat daarop bereken is om die goeie orde te versteur;

- (b) die afvuur van vuurwapens, windbukse, windpistole, vuurwerke of die gebruik van rekkers, slingervelle of katapulte sonder die munisipaliteit se skriftelike toestemming;
- (c) die brand van rommel of vullis;
- (d) die veroorsaking van onaangename of aanstootlike reuke;
- (e) die verwekking van rookoorlaste;
- (f) die veroorsaking van steuring deur bakleiery, geskree, getwis of gesing of die speel van musiekinstrumente, of die gebruik van luidsprekers, radio-ontvangstoestelle, televisiestelle of soortgelyke toerusting;
- (g) te bedel vir geld, kos of werk of die aanbied van dienste, of
- (h) op enige ander wyse 'n oorlas, belemmering, stoornis of ergenis vir die publiek veroorsaak.

Gesondheidsaangeleenthede

- 6. Geen persoon mag in of by 'n openbare gerief –
 - (a) enige vullis, afvalstof, materiaal of enige stof of ding stort, laat val of neersit of toelaat dat dit gedoen word, behalwe in 'n houer wat vir daardie doel in of op die gerief verskaf is nie;
 - (b) op enige wyse die water in enige bad, swembad, dam, spruit, rivier of waterloop besmet of besoedel nie;
 - (c) in enige bad of swembad gaan nie terwyl hy aan 'n besmetlike of aansteeklike siekte ly of oop wonde aan sy liggaam het nie;
 - (d) enige handeling verrig wat die gesondheid van enige besoeker aan 'n openbare gerief kan benadeel nie.

Strukture

- 7. Geen persoon mag sonder die voorafverkreë skriftelike toestemming van die munisipaliteit enige struktuur, skerm of enigiets anders, behalwe die parkering van 'n woonwa of tent wat vir kampeerdoeleindes opgerig is op 'n terrein wat spesifiek by kennisgewing daarvoor afgesonder is, in of op 'n openbare gerief oprig of aanbring nie.

Drank en voedsel

- 8. (1) Geen persoon mag in stryd met 'n bepaling van 'n kennisgewing enige alkoholiese of enige ander drank of enige voedsel van welke aard ook al in 'n openbare gerief inbring nie.

- (2) Behoudens die bepalings van subartikel (1), mag geen persoon op, in of by 'n openbare gerief, in stryd met 'n bepaling van 'n kennisgewing, enige voedsel van welke aard ook al, gaarmaak of voorberei nie, behalwe op plekke wat vir so 'n doel by kennisgewing afgesonder is; met dien verstande dat die voorbereiding en gaarmaak van voedsel in of by 'n openbare gerief op 'n skoon en higiëniese wyse moet plaasvind sodat dit nie aanleiding tot buitensporige rook of ander oorlaste, of enige gevaar vir die gesondheid inhou nie; met dien verstande voorts dat geen lewendige diere, pluimvee of visse op, in of by 'n openbare gerief doodgemaak of afgeslag mag word nie.

Diere

9. (1) Geen persoon mag enige lewendige dier, voël, vis of pluimvee in 'n openbare gerief inbring nie behalwe ooreenkomstig voorskrifte van die munisipaliteit;
- (2) Die voorskrifte in subartikel (1) bedoel, word by wyse van kennisgewing bekend gemaak.

Gebruik van openbare geriewe

10. (1) Geen persoon mag sonder die toestemming van die munisipaliteit, of in stryd met enige voorwaardes wat die munisipaliteit by die verlening van sodanige toestemming mag oplê, in of by 'n openbare gerief –
- (a) 'n openbare vermaaklikheid reël of aanbied nie;
 - (b) geld of enige ander goedere vir liefdadigheid of enige ander doel van die algemene publiek insamel nie;
 - (c) enige pamflet, plakkaat, skildery, boek, strooibiljet of enige ander gedrukte, geskrewe of geskilderde werk vertoon of versprei nie;
 - (d) enige vergadering reël, hou of toespreek nie;
 - (e) 'n openbare byeenkoms of optog, uitstalling of uitvoering reël of hou nie;
 - (f) enige ambag, beroep of besigheid bedryf nie;
 - (g) enige ware of artikels uitstal, verkoop of verhuur of te koop of te huur aanbied nie;
 - (h) 'n veiling hou nie;
 - (i) teen vergoeding waarsêery beoefen nie;
- (2) By die toepassing van hierdie verordening beteken "openbare byeenkoms of optog" 'n byeenkoms of optog van 15 of meer persone wat nie deur nasionale of provinsiale wetgewing gereël word nie.

Veiligheid en orde

11. (1) Geen persoon mag, behoudens subartikel (2) in of by 'n openbare gerief-
- (a) enigiets binne so 'n gerief beskadig of ontsier nie;
 - (b) enigiets binne so 'n gerief gebruik of poog om dit te gebruik vir 'n ander doel as waarvoor dit bestem of by kennisgewing bepaal is nie;
 - (c) 'n vuur aansteek of voedsel voorberei nie, behalwe op 'n plek wat vir daardie doel by kennisgewing aangedui is;
 - (d) enige brandende of smeulende voorwerp weggooi nie;
 - (e) enige rots, klip of voorwerp van enige berg, koppie, skuinste, krans of wal gooi of afrol nie;
 - (f) enige boom, plant, struik, gewas of blom uittrek, pluk of beskadig nie;
 - (g) hom/haar op 'n onbehoorlike, onfatsoenlike, oproerige, geweldadige of onbetaamlike wyse gedra nie.
 - (h) 'n steurnis veroorsaak nie;
 - (i) 'n voertuig was, poleer of herstel nie;
 - (j) in 'n blombedding loop, staan, sit of lê nie;
 - (k) enige dier, voël of vis doodmaak, beseer, agtervolg, pla, mishandel of vang of 'n voël nes of eiers verplaas, versteur, vernietig of verwyder nie;
 - (l) in stryd met 'n bepaling van 'n kennisgewing op gras loop, staan, sit of lê nie;
 - (m) op 'n bank of sitplek lê of dit op so 'n wyse gebruik dat ander gebruikers of voornemende gebruikers dit onmoontlik vind om daarvan gebruik te maak nie;
 - (n) op speelarktoerusting speel of sit nie, behalwe indien die betrokke persoon 'n kind onder die ouderdom van 13 jaar is;
 - (o) in stryd met 'n bepaling van 'n kennisgewing in 'n visdam, spuitfontein, stroom of vywer swem, loop of speel nie, of
- (2) Die munisipaliteit kan by wyse van kennisgewing enige van die handeling in subartikel (1) bedoel en onderworpe aan die voorskrifte wat die munisipaliteit nodig ag en in die kennisgewing vermeld, magtig.

Water

12. Geen persoon mag in of by enige openbare gerief enige waterbron of watertoevoer misbruik, besmet of besoedel, of water vermors nie.

Wasgoed en skottelgoed

13. Geen persoon mag in of by enige openbare gerief enige skottelgoed of wasgoed was of klere uithang nie, behalwe op plekke wat vir daardie doel by 'n kennisgewing aangedui is.

Voertuie

14. (1) Geen persoon mag enige vragmotor, bus, motorkar, motorfiets, motordriewiel, fiets of enige ander voertuig, vaartuig of vliegtuig hetsy by wyse van meganiese, dierlike, natuurlike of menslike krag aangedryf, in 'n openbare gerief inbring nie, behalwe ooreenkomstig die voorskrifte van die munisipaliteit;
- (2) Die munisipaliteit bepaal die snelheidsgrens wat van toepassing is in 'n openbare gerief;
- (3) Die voorskrifte in subartikel (1) bedoel en die snelheidsgrens in subartikel (2) bedoel, word by wyse van kennisgewing deur die munisipaliteit bekend gemaak.

Spele

15. Geen spel van welke aard ook al mag in of op 'n openbare gerief gespeel of bedryf word deur enige persoon of persone nie, behalwe op die plekke wat vir daardie doel by kennisgewing afgesonder is en ooreenkomstig die voorskrifte van die munisipaliteit wat by wyse van kennisgewing aldus bekend gemaak word.

Herroeping

16. Die Standaard Regulasies insake Munisipale Parke, gepubliseer by Provinsiale Kennisgewing 103 van 1952, soos gewysig, word hierby herroep vir soverre dit op die Oudtshoorn Munisipaliteit van toepassing is ingevolge die aanname daarvan deur die raad van sodanige Munisipaliteit en afgekondig by Provinsiale Kennisgewing 609 van 1953, word hierby herroep.

Strafbepalings

17. Enige persoon wat 'n bepaling of voorskrif van hierdie verordeninge oortree of versuim om daaraan te voldoen, of 'n kennisgewing of voorwaarde in terme van hierdie verordening oortree of versuim om daaraan te voldoen, ongeag of sodanige oortreding of versuim elders in hierdie verordeninge tot 'n misdryf verklaar is, al dan nie, is skuldig aan 'n misdryf en by skuldigbevinding strafbaar met -
- (1) 'n boete of gevangenisstraf vir 'n tydperk van hoogstens ses maande, of óf sodanige boete of sodanige gevangenisstraf óf beide sodanige boete en sodanige gevangenisstraf;
 - (2) in die geval van 'n voortdurende misdryf, met 'n addisionele boete, of 'n addisionele tydperk van gevangenisstraf van 10 dae, of óf sodanige addisionele boete of sodanige addisionele gevangenisstraf, òf beide sodanige addisionele boete en gevangenisstraf vir elke dag wat sodanige misdryf voortduur, en
 - (3) 'n verdere bedrag gelyk aan enige koste en uitgawes wat na bevinding van die hof deur die munisipaliteit aangegaan is as gevolg van sodanige oortreding of versuim.